

Қазақстан Республикасының Мемлекеттік кіріс министрлігі мен Тәжікстан Республикасы Үкіметінің жанындағы Кеден комитетінің арасындағы ынтымақтастық және кедендік құжаттар мен кедендік қамтамасыз етулерді өзара тану туралы келісімді бекіту туралы

Қазақстан Республикасының Заңы 2001 жылғы 1 наурыз N 158-II

Душанбеде 2000 жылғы 13 маусымда жасалған Қазақстан Республикасының Мемлекеттік кіріс министрлігі мен Тәжікстан Республикасы Үкіметінің жанындағы Кеден комитетінің арасындағы ынтымақтастық және кедендік құжаттар мен кедендік қамтамасыз етулерді өзара тану туралы келісім бекітілсін.

Қ а з а қ с т а н Р е с п у б л и к а с ы н ы ң

Президенті

**Қазақстан Республикасының Мемлекеттік кіріс министрлігі мен Тәжікстан Республикасы Үкіметінің жанындағы Кеден комитетінің арасындағы ынтымақтастық және кедендік құжаттар мен кедендік қамтамасыз етулерді өзара тану туралы
Келісім**

(2001 жылғы 21 наурызда күшіне енді - СИМ-нің ресми сайты)

Бұдан әрі Тараптар деп аталатын Қазақстан Республикасының Мемлекеттік кіріс министрлігі және Тәжікстан Республикасы Үкіметінің жанындағы Кеден комитеті,

Екі мемлекеттің кеден қызметтері арасындағы ынтымақтастықты бұдан былай да дамытуға әрі нығайтуға ұмтыла отырып,

тауарлар мен көлік құралдарын өткізу кезіндегі кедендік шарттылықтарды ж е ң і л д е т у м а қ с а т ы н д а ,

мына төмендегілер туралы келісті:

1-бап

Қазақстан Республикасы Мемлекеттік кіріс министрлігінің атынан осы Келісімнің ережелерін іске асыру жөніндегі уәкілетті орган Қазақстан Республикасы Мемлекеттік кіріс министрлігінің Кеден комитеті болып табылады.

Тәжік Тарапынан осы Келісімнің ережелерін іске асыру жөніндегі уәкілетті орган Тәжікстан Республикасы Үкіметінің жанындағы Кеден комитеті болып табылады.

Жоғарыда аталған уәкілетті органдардың атаулары немесе функциялары өзгерген кезде Тараптар дипломатиялық арналар бойынша уақтылы хабарланатын болады.

2-бап

Тараптар әрбір Тарап мемлекетінің ұлттық заңдарының шеңберінде кедендік және валюталық ережелердің сақталуын бақылауды қамтамасыз ету мақсатында кеден мәселелерінде жан-жақты ынтымақтасады және бір-біріне қажетті көмек көрсетеді.

3-бап

Осы Келісімде көзделген мақсаттарға қол жеткізу үшін Тараптар жүк және жолаушылар қатынасындағы, пошталық алмасудағы кедендік ресімдеуді жеделдетуге, кедендік бақылаудың нысандары мен әдістерін жетілдіруге, сондай-ақ көлік құралдарының, жүктер мен жолжүгінің, пошталық жөнелтілімдердің, валютаның, басқа да төлем құралдары мен валюталық құндылықтардың (бұдан әрі мәтін бойынша - тауарлар) заңсыз әкелінуінің, әкетілуінің және транзитінің алдын-алуға бағытталған қажетті шараларды қабылдайтын болады.

4-бап

Тараптар шекара арқылы өтетін тауарларды Тараптар мемлекеттерінің кедендік және валюталық ережелеріне жауап беретін, сондай-ақ жүк, жолаушылар мен пошта қатынастарында қолданылатын тиісті құжаттармен қамтамасыз ететін болады.

5-бап

Тараптар мемлекеттерінің бірінің аумағы арқылы екінші Тарап мемлекетінің аумағына транзитпен өткізілетін, сондай-ақ бір Тарап мемлекетінің аумағында ресімделген және Тараптар мемлекеттерінің аумақтары арқылы транзитпен өтетін тауарлар олардың әкелінуіне, әкетілуіне және транзитіне Тараптар мемлекеттерінің ұлттық заңдарымен тыйым салынған деп санайтын негіз болған жағдайды қоспағанда кедергісіз тасымалданатын болады не Тараптар мемлекеттерінің ұлттық заңдарына сәйкес кеден төлемдері мен салықтарын кепілдік төлеуді қамтамасыз ету сомаларын енгізу туралы талап қолданылады.

6-бап

Тараптар кедендік құжаттарды, көлік құралдарындағы, жүктердегі және пошталық жөнелтілімдердегі кеден пломбыларын, мөрлер мен мөртаңбалардың бедерлемелерін, ресми белгілерді өзара танитын болады. Олар, сондай-ақ, экспедиторлық және көліктік ұйымдардың пломбылары мен мөрлерін, олардың көлік құралдарындағы ресми белгілерін де өзара танитын болады.

7-бап

Тараптар осы Келісімнің 5-бабында аталған кедендік құжаттар мен кедендік қамтамасыз етулердің үлгілерімен, сондай-ақ мемлекеттерінің аумақтары арқылы әкелінуі, әкетілуі немесе транзиті шектелген немесе Тараптар мемлекеттерінің ұлттық заңдарымен тыйым салынған тауарлардың тізімдерін алмасады.

8-бап

Тараптар өзара уағдаластық бойынша кеден құжаттарын бір ізге түсіруге ұмтылады.

9-бап

Егер бір Тарап мемлекетінің аумағына екінші Тарап мемлекетінің аумағынан әкелінетін тауарлар кедендік, валюталық, санитарлық, карантиндік немесе малдәрігерлік ережелердің және/немесе әкелу нұсқаулықтарының негізінде не қауіпсіздік түсінігі бойынша өткізілуге жатпайтын болса, Тараптардың кеден органдары өз мемлекеттерінің аумағына осы тауарларды өткізуден бас тартудың себептері туралы хабарлайды.

10-бап

Тараптар Қазақстан Республикасының және Тәжікстан Республикасының азаматтары осы елдердің аумақтары арқылы үшінші елге өткен кезде қол жүгі мен жүкті кедендік бақылау және шығару Тараптар мемлекеттерінің ұлттық заңдарын сақтай отырып жүргізіледі деп келісті.

О с ы м а қ с а т т а :

- Қазақстан Республикасының кеден органдары Тәжікстан Республикасы азаматтарының қол жүгі мен жүгіндегі тауарларды шығаруды Қазақстан Республикасының кеден органдары куәландырған кеден декларациялары негізінде жүзеге асырады.

- Тәжікстан Республикасының кеден органдары Қазақстан Республикасы азаматтарының қол жүгі мен жүгіндегі тауарларды шығаруды Тәжікстан Республикасының кеден органдары куәландырған кеден декларациялары негізінде жүзеге асырады.

11-бап

Тараптар кеден ісі мәселелері жөніндегі нормативтік құқықтық актілер туралы ақпаратты бір-біріне беретін болады.

Тараптар нормативтік құқықтық актілердегі, қызметтік нұсқамалардағы және

кедендік құжаттар мен қамтамасыз етулердің нысандарындағы өзгерістер мен толықтырулар туралы бір-біріне уақтылы хабарлайды.

Тараптар жазбаша немесе ауызша нысанда кеден ісі мәселелері жөнінде тәжірибе алмасуды жүйелі түрде жүзеге асыратын болады.

12-бап

Кедендік құжаттар жөнелтетін мемлекеттің ұлттық заңдарында көзделген тілде, сондай-ақ қажет болған жағдайда орыс және ағылшын тілдерінде жасалады.

Тараптар арасындағы хат-хабар алмасу орыс тілінде жүргізіледі.

13-бап

Осы Келісімді орындауға, түсіндіруге және өзгертуге байланысты барлық даулы мәселелер Тараптар арасындағы консультациялар және келіссөздер арқылы шешіледі.

Осы Келісімге екі Тараптың өзара келісімі бойынша осы Келісімнің ажырамас бөлігі болып табылатын, хаттамалар түрінде ресімделетін өзгерістер мен толықтырулар енгізілуі мүмкін.

14-бап

Осы Келісімнің ережелері басқа да халықаралық шарттарға сәйкес Тараптар мемлекеттері қабылдаған міндеттемелерге ықпал етпейді.

15-бап

Осы Келісім бес жылдық мерзімге жасалады және қажетті мемлекетішілік рәсімдерді орындағаны туралы Тараптар бір-біріне дипломатиялық арналар бойынша соңғы жазбаша хабарлама жіберген күннен бастап күшіне енеді. Келісімнің қолданысы келесі бесжылдық кезеңдерге өздігінен ұзартылатын болады және Тараптардың бірі оның қолданысын тоқтату ниеті туралы екінші Тарапқа жазбаша хабарлама жіберген күннен бастап 6 ай өткенге дейін күшінде болады.

Душанбе қаласында 2000 жылғы 13 маусымда қазақ, тәжік және орыс тілдерінде екі дана болып жасалды және де барлық мәтіннің күші бірдей.

Осы Келісімнің ережелерін түсіндіру қажеттілігі кезінде орыс тіліндегі мәтін негізге алынады.

*Қазақстан Республикасының
Мемлекеттік кіріс министрлігі
үшін*

*Тәжікстан Республикасының
Үкіметі жанындағы Кеден*

комитеті үшін

М а м а н д а р :
Қ а с ы м б е к о в Б . А .

Багарова Ж.А.

© 2012. Қазақстан Республикасы Әділет министрлігінің «Қазақстан Республикасының Заңнама және
құқықтық ақпарат институты» ШЖҚ РМК